

Biakpiakna Thu Theihtelna



SABBATH NITAAK

Tu Kaalsung Simding: *Isa. 1:2–15; Heb. 10:3–10; Pai. 12:1–11; 1 Kor. 5:7; Hag. 2:7–9; Isa. 6:1–5; Mang. 4:7–11.*

Kamngah: Amaute in la thak khat sa uh a, “Nang in laizial a la ding le, Ciaptehnate a phelkhia dingin na kilawm hi. Banghang hiam cihleh thahna na thuak ngei zo a, Minam khempeuh, pau nam khempeuh, Mi khempeuh le gam khempeuh lak panin, Pasian aa dingin nangma sisan tawh kote nong tan khin hi.” (*Mangmuhna 5:9, ZSV*)

Tuiphum John in ama’ kiangah Zeisu hongpai ciangin: “En un! Pasian’ Tuuno, leitung mawhna a lakhiapa hi” (*John 1:29*) ci in kiko hi. Hihthu peuhmah pen gangawh biakna lungngaihna hi-a, mi khempeuh adingin Khazih’ in aiawh hong sihsakna kawc cih kitelpha mahmah hi.

Lai Siangtho sungah, gangawh biakna peuhmah kinusia thei lo hi. Lai maitang ahi khausan tai bang in, Mangmuhna laibu thu bulpi in John in Pasian’ tokhom dongah paipih hi (*Mang. 4 le 5*). Hih teng ah Zeisu pen a kigo tuuno ci in a thupipen munah hong kilangh a, (*Mang. 5:6*), genkhohlhna teng khempeuh telcian theih na’ng thubulpi hong suak hi.

Tu kaalsung, Zeisu pen a kigo tuuno, vantung tokhom tunga mapang pipen ahihna hong telcian sak ding gangawh biakna thu bulpi pawlkhat sinding hihang. Kuamah dang a kilawmlh laitak in, Amah bek kilawm a, tua Ama’ kilawmna pen gangawh biak na sung tawntung a Topa’ sepna khempeuh hang ahi hi. Mong neilo itna tawh hong kipiakkhiatna Pasian hong itna lahna hi-a, vannuai buppi ngaihsutna nei khempeuh in lamdang a sak tawn tung ding thu ahi hi.

*May 10, Sabbath ading kiginkholhna in tukaal lesson sim in.

Kimanna Neilo Biakpiakna Hiam?

Khatveivei, thu namnih enkak leng pilna hong guan thei hi. Lai Siangtho sunga tang sagawh biakna omzia leh, Pasian in Amite sa gawh biakna a *nial* taktak enkak leng theihna hong khangsak thei hi.

Simin, Isaiah 1:2–15; Isaiah 56:6, 7; le Late 51:17 enkaak in. Gangawh biakna tawh kisai a thupi bangteng gen hiam?

A lipkaphuai Israel' tangthu sunga biakpiaknate Pasian in a nialna pen anial masakpen na zong hipanlo a; hotkhatna tangthu a kipatcil limlim, Abel' biakna kisang in Cain' biakna a kisanloh pen a masapen hizaw hi. Amasa zaw tangthu in a santakcing le a santak cinglo biakpiakna tehkaak nading thulem khat hizaw tham hi (*Pian. 4:3–7 le Heb. 11:4*) enkaak in.

Isaiah' hunlai in, Israel in, Pasian lungdamsak theih nading a tawmpen bang hiam cih zong uh a, amaute lah a ut a nuam un om uhhi. Amau' biakpiakna zong Cain' biak piakna mahbang in, Pasian tungah ki-aapna omlo in angkhualna bektawh pia uhhi.

Hih leitung kumpite a gamtang sak lungsim mah pua uh a; cingtaak kisa ziau uhhi. Cain zong ama' utbang in nungta in, ama' lungkimna zeh tawh Pasian bia hi. Cain in Pasian pen ama' mailam khak lel khat khawlpah ding a lemtang lo ci in ngaihsun hinapi, Pasian a kihtakna ciang khat bel neiveve cih ki ngaihsun thei pah hi.

Abel in ahihleh, Pasian' kalhna bang lianin hong pai ding Messiah (*Pian. 3:15*) pholakna in, tuuno tawh bia a: Calvary ah Khazih hong sep ding teng kawh hi.

“Abel inbel tatkhiatna thukhunte lenkip hi. Mawhnei ahihlam kithei a, mawhna' thaman sihna cihzong tel in, ama' kha leh Pasian kikal ah amah ding hi. Nuntakna khat go in keng a, thukham ki palsat cih hong theisak hi. Sisan luanna tawh mailam a biakpiakna, Khazih in Calvary singlamteh ah hong sihna; tua munah a kipia ding biakpiakna zong muang in, amah thumaan ahih manin, ama' biakna kisang ci in teci pang thei hi”—Ellen G. White, *Patriarchs and Prophets*, p. 72.

“Eima kalsuan zia” kikep ding bangzah thupi thei ding hiam! Zeisu' sihna bekmah pen eite lam-etna khatbek hi ci in lung muantheihna koibang in neitheih ding ihi hiam?

Bawngtalte le Keltalte' Sisan

Pawlkhath in sagawh biakna pen mawhsak mahmah in, ngongtatlua, khauh gemgam, thutanglo ci uhhi. Cihtheih ding mah hi. Mawhnei a ding mawhneilo Khazih' sihna in ngongtat, khauh in thutanglo hi. Tua hangmah in mawhna thubuai vengsak thei pah hi. Tua Khazih' sihna in ngongtatna, khauhna leh thutang loteng mah hong lak hizaw hi.

Simin, Heb. 10:3–10. Hih tangthu tengin Lai Siangtho Lui sung a Pasian' mite' sagawh biakna koici honghilh hiam? Tua teng in mawhneite gumkhia taktak zolo ahiehleh, banghang in tua biakna te kipia hiam?

Tuuno le ganno dang biakpiak nate in Pasian' Tuuno biakpiakna teng limpua ahi hi. Upna tawh nasepna hi a, mawh neite in hong pai ding Messiah a upna uh kitel takin a pholak theihna ding uh hizaw hi. Hihte pen limpuate kici a, tua limpuate in a limpuak uh a taktak hong tangtung hi. Pawlkhath bangin tua biakpiakna tepen “genkhohlhna neu” ciliang uhhi.

Sagawh biakna tawh kizom kithoihna te ahiehleh khualzin ding bang ahi hi. Meileng, bus leh vanleng letmat khawng nalei ciangin, khualzin theita cihna na hipah naikei hi. A huangsung lut theihna ding letmat hiphot phot a: hongpai ding khual ah zin thei taktak ding cih kamciamna ahi hi. Tua laidal tungah na deihna teng omkhin ding ahiehhang, tua laidal in napai na'ng munkhat peuhpeuh ah hong tonpih thei tuanlo hi. Huangsung na lut theih khith nakleh, khualzin a kipan na hita a, na piaksa bangin a ngah khin na hita a, tua laidal kul toto nawnlo ta hi.

Sagawh biakna zong tua mahbang ahi hi. Panmun thupi mahmah khat nei uh hinapi, khatvei a kibawl khith nakleh, amau un khiatna nei nawnlo ahiehna zong Zeisu' sih lai in, Siangtho mun leh Siangthobel mun kikal a puandal phelnih a kisuahna in hong telcian sak taktak hi (*Mark 15:38*). Sagawh biakna buppi leh biakinnpi in singlamteh tungah Zeisu' hong sihna kaww uhhi. Zeisu in singlamteh tungah Ama' kamciamsa teng a picin khith, gualzo takin hong thawhkik khith ciangin, limpua teng kisan nawnlo ta hi.

Hong sunglut Pasian' Thu Zeisu' sihna bek tawh aki thoih dam thei tua mawhna in bang zahin siahuai hiam cih ngaih sun in (*John 1:1–3, 14*). Hihthu in mawhna tungah eima muh dan ding bangteng ci hiam?

Paisanpawi Tuuno

Mangmuhna laibu in Zeisu pen “Tuuno” a cihna sawmthum vei bang om hi. Tatkhiat ding aki ngiim cillai panin, Pasion’ mite in hong pai ding Messiah limpua in tuuno zang khin uhhi. Abel in “ama’ ganno lakpan ta upa” (*Pian. 4:4*) piakhia a, Israel in kamciam gam zuan dingin Egypt a nutsiat madeuh in, amau leh a ganhing khempeuh pan ta upa tengpen, kumkhat apha tuuno tawh tankhia uhhi (*Pai. 12:5*).

Simin, Pai. 12:1–11; Isa. 53:7, 8; 1 Kor. 5:7; le Mang. 5:6.
Zeisu in Paisan tuuno ahihna hihmun tengin bang gen hiam?
Eimah mimal ading bang khiatna ni hiam?

Khazih a sih, thawhkik le vankah khit tawlkhat ciangin, Peter in hu-muamna tawh “Napu napate uh nuntakzia, bangmah in a kimanglo nuntakna panin hong suahtak sakna dingin Pasion in note’ man ding in a piakpen, a mankiam thei ngun leh kham bang hilo in, tuuno bangin paubaanna a omlo, a manpha mah mah Khazih biakna in hong kipiakna tawh Pasion in note hong suakta sak hi.” (*1 Pet. 1:18, 19*).

Zeisu in mihing khat hihna tawh Pasion lungkimpieh nuntak na nungta hi; eite ihihleh mawhnei hihang a, tua mawhnei nuntakna in hong Piangsakpa’ thu a zuaupi teng gen hi. Zeisu in “Adam nunung” (*1 Kor. 15:45*) cihi. Eite’ guallelhna munah Amah’n picing takin nungta hi. Mihing ahihna tawh, mihing hih ding khempeuh Amah’n hih hi. Picing takin Pasion’ minthanna lengkik sak hi. “Kei nong muh khit nakuh leh, Pa namu khin zo uhhi” (*John 14:9*).

Zeisu in Paisan tuuno taktak ahih manin Paisan pawe ni in kikhai hi. John 18:19, 20 sungah Zeisu in “mi khempeuh theih in thu kagen” cihi. Tua mahbang in Paisan tuuno tungtang a Pai.12:5, 6 sungah, Israel mite in Paisan pawe ading tuuno khat teel ding a, gawh hun a tun mateng “*kemcing*” ding ci in vaikhak hi. Siampi lianpa in Zeisu’ thuhilhna tawh kisai dotna a bawl ciangin, Amah in biakinn sungah thuhilh in nisim in a om tawntung ngaihsut huai cihi. Ama’ nuntakna, a nasepna leh a thuhilh in Amah bang hiam cih hong lak hi. Amah melhemna neilo Tuuno hi a, a vanglianpen Pasion’ dikna leh minthanna lah na ahi hi

Eima nuntakna sungah Zeisu’ nuntakna koibang in lengkik saktei ding ihi hiam?

Biakbuk ah Zeisu

Hotkhiatna tangthu sungah kitelkhialhna om kinken hi. Pasian in hunkhat lai in Amah tawh kikhawlhna bang nopsakna teng ngakkik dingin hong deihsak hi. Ahihhang mawhnei mi in Pasian' mai tung peuhmah leh kisia ding uhhi. "Gitlohna lamsang adeih Pasian nahi kei a, siatna in tawlkhat zong nang tawh a omkhawm thei ahi kei hi" (*Late 5:4*). Tualai hun mah in David in zong "Kei kahih leh a kicing itna kip suang in, na inn sungah ka tum ding a, nangmah zahtakna tawh kun in a siangtho biakinn lam nga in, kong bia ding hi" (*Late 5:7*).

Simin, Haggai 2:7–9. Anihna biakinn a kilam laitak in, kamsang Haggai in a lamdang kamciam khat bawl hi: Biakinn thak in biakinn lui in minthang zaw ding ci hi. Tua genkholna in bang khiatna nei hiam?

Biakinn masa Solomon in aapna a bawl ciangin, Canaan tundong Israelte a tonpih Pasian' ompihna Shekinah meii in biakinn sung hong kidim ahih manin siampite in na semzom thei nawnlo uhhi (*1 Kumpi 8:10, 11*). Biakinn nihna aapna ni ciangin, Pasian' tokhom limpua thukham singkuang hong omlo a – Jeremiah in seel cihi. Tutung ciangin Pasian' ompihna in biakinn sung hong kidim nawnlo hi. Tuathu in lungsim kitamzan sak hi. Haggai' kamciamna in koibang in tangtung mawkmawk thei hiam?

Pasian hong sunglut Zeisu in silehsa pumpi tawh hong kilatna pen biakinn nihna sung ahi hi. Pasian Amah' ngiat in puandal nungpan in hong paikhia in eimah khatmah bang in a kisiasa leitung eite lakah hong kihel hi. Pasian' Tapa in mihing' Tapa hongsuak ta ahih manin, Ama' maitang mu thei, a aw za thei, teci pansak thei hihang. A siangtholo miphakpa (*Matt. 8:3*) a lawn etpak theih ahi hi. Pasian' kianglam kihei in vanaih leng, Amah zong eilam hong kihei in hong naihi hi. Ei kianglah Amah mimal ngiat hong tuaksuk hi. Lai Siangtho in Zeisu tawh kisai: "Nungak khat gai in tapa khat nei ding a, ama' min dingin Emanuel kiphuak ding hi. Emanuel a khiatna eite tawh hong omkhawm Pasian a cihna hi" (*Matt. 1:23*) cihi.

Singlamteh pen Pasian' itna lahkhiatna lianpen ahi hi. Pasian hong itna a kiciap theihna ding koibang dan teng om thei ding hiam?

Nangmah in Na Khempeuh Na Piangsak Hi!

Kamsangte in a mangmuhna sungvuah Pasion' tokhom mu thei dingin hunlem tam veipi ngahkha uhhi. Ezekiel in vankuum tungzang a om mu hi (*Ezek. 1:26*); Isaiah in zong tua a mu dingin vantung biakbuk vahawh hi (*Isa. 6:1*), ei a dingin a kitelcian penpen in John zong mangmuhna tawh kipaipih hi (*Mang. 4 le 5*). Lai Siangtholui sunga biakinn' nasepna limpua tengin: Pasion' maiah mihing lut theihna ding pen Khazih' sisan bekma hi cih hong tellah mahmah hi (*Siampi. 16:2, 14*).

Simin, Isaiah 6:1–5 le Mang. 4:7–11. Hih mangmuhna tegel aki zawitawinna bang teng om hiam? A thu paidan teng enpha in: Bangthu pulak masa pen hiam? Bang in zui hiam? Pasion tawh kisai bang thumaan bulphuh deuh hiam?

Hih Pasion' tokhom mangmuhna tegel sungah, thu piang masa pen in vanmite in Pasion' siangthona thupisak uhhi. Isaiah mangmuhna zong lungluthuai mahmah: biakinnpa meikhu tawh kidim a, seraphim te in Pasion' siangthona a pahtawi kawmin “kongkhak khuamte” zong kiliing cih. John' mangmuhna sung ah, cherubim te in zong “*Siangtho, Siangtho, Siangtho*” ci in kiko uhhi. (*Ezekiel 10:14, 15* in zong ganhing nungta a cihteng pen cherubim cih). Kamsang khatsim pen Pasion' vangliatna te zialzial tawh kilak hi.

Tua ciangin kamsangte' dawnsukna honglak hi. Isaiah in zong amah muk siangtho lopa ci in kiko a (*Isa. 6:5*), John zong a cikziathuai thumaan a hongkhia ding khat zong a muhloh manin kap hi (*Mang. 5:4*). Pasion' kilawmna hong ki pholak ciangin ei mihing' dinmun ki phawkkha thei pan hi. Eite kilawmlo lua ihih manin, Tanpa ding Khazih i kisam uhhi.

Satan in zong Pasion' mawhsak den in, aana zanglua, angkhual leh lipkhaphuai mahmah ci hinapi; Pasion' tokhom maiah tawmvei sung bek omna in zong Satan' zuaauthu pholak sakhap hi. Khazih “a kigosa Tuuno” (*Mang. 5:12*) muhna Amah taktak amu uh hi a, tua in Pa taktak hong musak ahi hi. Zeisu i muh nakleh Pa muh mahbang cihthu in lung- nophuai lua hi (*John 14:9*). Pa' omzia pholak theihna lianpen in Zeisu singlamteh tungah hong sihna mah ahi hi.

Tua hi a, singlamteh in thu nih honglak hi: *amasa* in, Amah hong kipiak liang zah dingin Pasion in hizahta in hong it; *anihna*, eite mawhnei mi a puksa mi ihihna leh Khazih singlamteh bekin ei hong gumthei cih hong lak hi.

Ngaihsutbeh Ding: Lai Siangtho in eite hotkhiatna hongpia tak tak ding pen Khazih bekmah ci sitset hi. Mawhneilo mihing' nuntakna Amah bekin nei a, Pasian' minthanna dingin a lungkim huai ettehcing nuntakna ahi hi. Mawh baanglo Pasian' Tuuno hi a, tu in mihingte tawntung bitna hongpia dingin mihing' lutangpi hongsuak hi. Tua laitak mahin, ei mawhna teng Amah'n pua a, migilote tungah Pasian in thu a khen theih nading thu picingsak hi. Vanmite khempeuh Pasian' tokhom maiah a kikhopna a muh na ah, John kahna khawl ding kisawl a, "Judah mite lakpan Humpinelkai in laizial phelthei ding" (*Mang. 5:5*) cih.

Mawhna le a puksa mihing dinmun bangzah in siahuai cih zong ngaihsun lecin, tua mawhna teng siansuahna dingin, Pasian Amah ngiat Zeisu' sihna bekin hihthei hi. Vantung thukhun pal sat hetlo in hotkhiat theihna'ng lampi dangkhat om hileh, tua pen Pasian in hih luatham ding hi.

"Pasian' thukham palsatna in mawhneite nuntakna kalpah hi. Vannuai buppi sung ah, mihing aitung in tua kalhna a picingsak thei khatbekmah om hi. Pasian a siangtho mah bangin a thukham zong siangtho a, Pasian tawh a kikum khat bekmah in mawhna thoih thei hi. Khazih bekmah in hih a puksa mihing te thukham samsiatna pan tankik thei a, vantung tawh zong hong kilemsak thei hi. A gilo mahmah mawhna Pa le a Tapa nangawn a khen khia thei mawhna pen Khazih in Ama' mawhna bangin Amah hong kisan hi. Khazih in mihing a hotkhiatna dingin tua mawhna thuk sung dong hong baansuk hi"—Ellen G. White, *Patriarchs and Prophets*, p. 63.

Kikupding Dotnate:

① John in tua Tuuno a "kigosa" bangin Pasian tokhom mai ah lut amu hi. *Mang. 13:8* in Zeisu pen leitung pian' mapek in a "kigosa" cih. Hotkhiat ding ngiimna pen eima kitang sap mapek panin Pasian in ngiimkhol khitna pan bang pilna kingah thei ding hiam?

② Pasian umlo tampi in eipen kuama' donloh leitung khat ah ki-omcip ci uhhi. Lai Siangtho sungah, Pasian in hong it lua ahihmanin hong tuaksuk liangin, hong sihlawh cizaw hi. Hih leitung le a sunga omte eite muhna le Pasian umlote muhna bangzah in kilamdang hiam? Thu dangkhat ah, singlamteh in eima seplebawl khempeuh koici huzaap hiam?

③ Khazih' nuntakna, sihna le thawhkikna bekmah in bang hangin mihing gumkhia thei hiding hiam? Tua man kipia in mawhna bangzah siahuai cih pulak hiam?

Khen 2 na: Kihun Ding Ngetna

Thupuaq:- ANDREW MCCHESENEY

High School aman kum khuakhal sungin Diana pen party hong kah mahmah hi. Ni khat, Monte Uista, Colorado-a paakhuan sungah a om laitak singkung a et tohleh singteh kawmte pan ni vaang ataan sukte mu hi. Tua laitak-in “Hih mun pan na pai khat keileh si ni teh” cih aw khat za hi. Diana in a nuntak zia kheel keileh a sih baih ding, ahin’ nopleh a kikheel kul lam kitel hi.

Amah zong amailam ding thu a nu tawh kikumkhawm hi. Anu in “Navy luut dingin na sawmgei hiam” cih. Diana zong hih bang peuh dong maw ci-in heh hi. Ahi zongin kha thum khitteh Orlando, Florida ah mi vapia hi. Tua khit ciang in amah zong leitung bup hong zin hi. Alungsim alawng tam pi mu hi. Teembaw khawlna mun khempeuh ah numei kizuak, sum kikhapna, asukzawte zong mu hi.

Diana zong teembaw zuite tawh kiteeng ziau hi. Amau zong Navy pana khual-in tathum hong nei hi. Monte Vista, Colorado ah teeng uh a, apasal in bel innkuan papi-a aom pen nop salo hi. Diana zong lung kipia in sih ding vai hawm hi. Ama sain ah cina-in si nuam hi. Tua khit ciangin ki suam leh ci hi. Lungkiat laitakin thu hong ngen hi. “Pasian aw na om lam thei ing, koi ah om na hiam cih bel thei ke’ng” ci hi.

Amai kaal teh lamdang takin-ah pawlpi 4 tawh kiho khakna a nei hi. Amasa pen ah missionry 2 a kong ah hongdawk hi. Inn sungah sam-a khat in Lai Siangtho leem-in mivomte pen siamsiatna tuak ahih manun vantung ah luut thei loding uh hi naci hi. Diana zong lungkimlo hi. Aneu lai-in Virginia gamte ah sang a kah lai-in amah bek mikang hi-in Pasian in mikhempeuh a it lam thei hi. Missionary pa kiang ah “paikhia in, tua LST mun hong simkhia na hiam” ci hi.

Azingteh numei thum hongpai hi. Diana in zong Sabbath thu dong hi. Tuat lakpan khat in “Ko nisim in Pasian bia ung” ci hi. Diana in zong hi sathei-in amau tawh muhkik sawm hi.

Tua khitteh huihpi anung Friday nitak khat ah piteek thaneu khat Diana’ inn konghong kiu hi. Sum a neihloh hangin Pizza Hut pan angah thaman tawm hawm hi. Amah’n tua nupinu mukik nawn lo hi.

Tua kaal sungin pawl dang pan a lawm khatin Diana sam hi. Biakinn sung aluut ciangin dawi omtuaksa-in hun manteh taipah hi.

Hih tangthu pen 2021 kum nipi 13na sumpi a ngah US-based Holbrook Seventh-day Adventist Indian School ii Development director asem Diana Fish ii thu hi. Tu quarter June 28 ni Sabbath 13 na sumpi tawh lungdamna thu kizelh nading na panpih man un kilungdam hi. Diana tangthu mai kaal ah sim beh in.

Khen I: A Huamin Etna

Thubulphuh: *Mangmuhna 9:24*

Lungngaih Ding: *Pian. 4:1-8; Isaiah. 53:1-12.*

Gangawh biakpiakna pen ni suahna lam ancient Near East (ANE) gamte ah kizang mahmah hi. Tuapen pasian vathoihi hi-in, huhna lam en kik hi.

Lai Siangtho in bel tua biakpiakna thu atuam dang-in hong gen hi. ANE ngei na ah bel anuai pan atung lam (mihing in Pasian lam) manawh hi. Lai Siangtho ah ben atung pan anuailam (Pasian in mihing lam) ma nawh hi. ANE ah bel nasian in amah a vaak kik ding-in mihing bawl hi. Lai Siangtho Pasian in mihingte bawl in an vaak hi.

Hih lesson sungah Lai Siangtho' thupisak gangawh biakpiakna thu sin ding hi hang. Lai Siangtho laak dan pen a kigelh dan zui hi. Moses gelhte le Khangtho bute ah gangawh biakna pen biakpiakna hi ci-a biakna thu teeng sak hi. Genkholhna le lakam sung leuleu teh kaww nopna thu maingat hi. Tangtho lamah bel Piancil 4 sung-a cain leh Abel te meihal biakpiakna thu leh mailam ah Sila Pa thuakna thu agen Isaiah 53 man hi hang.

Khen II: Hilhciaanna

Biakna le Zialetong Tawh Kipawl Meihal Biakpiaknate

Amasa pen in kikeelki-in thu Cain le Abel thu ah kimu thei hi. Cain in "leitang pan apiang ante" (*Pian 4:3*) a paipih laitak-in Abel in "zong" "tuu hon sungpan a piang masate" paipih hi (*Pian 4:4*). Tua ahih manin Abel piakna pen ante, sathaute banah meihal biakpiak nading ganhing apaipih pen Lai Siangtho hilhna tawh kizawitawn hi (*Pai. 29:39-41*). "Abel in tuu khawi-in, Cain in lo' kho" (*Pian. 4:2*) cihthu thei kawm-in, Cain in lo' kho" (*Pian. 4:2*) cih thu thei kawm-in, u zaw pa Cain pen anau pa' hihna hong kisam hi. Cain' kiphatsakna in tua bang-in gamta sak hiding hi.

Lai Siangtho ah "Topa in Abel biakpiakna thu simin Cain le ama biakpiakna a thusim kei hi" ci hi (*Pian. 4:4,5*). Lai Siangtho sungah Abel aa sang-in Cain aa asan' lohna thu ahang genlo hi. Ahih hangin khil theih ding pawlkhat om hi.

1. Pasion' kin masak pen apia pa hi. A kammal lian dan kiletleh "Pasion in lungluutna tawh Abel en hi, tua hi-a [waw] apai pihte: ahih hangin Cain pen lungluutna taw hen lo-in, tua hi-a [waw] apai pih te." Hih kiletah ah Pasion in biakpiakna asan' le a nialna pen a piapa' kha dinmun ah kinga hi, a paipih nate tengah kingalo hi (*Mic. 6:7, 8; Isa 1:11*).

2. Cain in "Topa kiang" pia-in, Abel in biakpiakna pia lel hi. Abel' thu ah "Topa kiang" cih kigenlo hi. Cain in Topa a piak sawm laitak in Abel-aa bel biakpiakna ii adeihna ah a lungsim tuzaw hi. Amal-in lo' le'ng ama tengah kipia Pasion' letsong hi. Cain in anuai pan atung lam laitak-in Abel in bel atung pan anuai lam manawh hi zaw hi cihtel hi.

3. Abel in "apiang masate" *bekorot* pan teel hi, Moses thukham dan-ah alim'ci pente hi (*Pai. 23:19*). Cain in leitang pan apiang ante paipih hi. Cain piakna pen Pasion kiang mihing hanciamna tawh piakna hi. Abel piakna bel mihing hanciamna tawh piakna hi. Abel piakna bel mihing in Pasion in hong hotkhiat ding kisap lam lak hi.

4. Abel piakna pen leitung ahonkhia ding Piansil 3:15 ah kiciam khol Messiah tuuno tawh kisai na om-in Cain aa bel a hawmpi hong hi hi. Mihing in a kikhuh tawm naleh Pasion in puan a vaihawm sak na saikaak in (*Pian. 3:7*). Adam le Eve te'n zum seel nadingin anai-a kingah singteh zang uh-a Pasion in gan biakpiakna pan kingah savun tawh zum seelsak hi (*Pian. 3:21*).

5. Atawpna ah Cain in thu man'na a neih lohna huhau-in mi hong that hi. Cain in Pasion tawh kizomlo ahih manin a sanggam pa tawh zong kizopna hong neilo hi.

Fratricide in mawhna in koi bangin nasem cih hih bangin pulaakna nei hi. Sanggam kithahna in mawhna' nasep honglak hi. Sanggamte tengah mawhna in Pasion zong va mawh to hi. Pasion in tua zia tel'in Cain thuhilh hi- "Hoih takin hih leteh nang hong kisang lo tuan ding ahi hiam? (*Pian. 4:7*). "Hoih takin" in biakpiakna maan a cihna hi-a Cain in tua danin piak kul, ahizongin Cain lungbuaina zong alak hi kawm hi, a sanggam pa tengah a lungsim koihia hi. Hebru verb *teytib*, "hoih takin" ah tat hoihna thu teeng hi. Hih verb mah Jeremiah in zong "mi khat le avengpa kikal" ah adeih sak kizop dan ding agenna ah na zang hi (*Jer. 7:5*).

Jeremiah in Israelte kiang thu ahihna ah kha thu le luheekzia thu a zopna lunglut huai hi, mawhna namte a khil khitteh (gu, khem, mawhpih) kamsan'na in a mipihnte tawh maitang kituah in “Ka min tawh a kilo hun inn sungah hong pai in” ci hi (*Jer. 7:10*). Hih dan kisapna pen Pasian' nial biakpiakna thu agen kamsang dangte'n zong na zang hi. Micah phadiak bang a khiatna neilo biak piakna na mawh sak mahmah hi. “Topa in tuatal a tultulte tawh lungkim ding ahi hiam?... Mihingte aw, amah in ahoih honglak khin hi. Thuman semin hehpihna lak a, kiniamkhiat takin na Pasian tawh kalsuan ding simloh, Topa hong kalh bangin om ahi hiam?” (*Mic. 6:7, 8*).

Gangawh Biakpiakna Mailam Thu Kawkna

Gangawh biakpiakna pen mailam kaww ahihna apigen pha diak mun pen Isaiah ii thusia thuak Sila la sungah om hi. Sila pa pen biakpiakna-in kinei ding kici ahih man in Zeisu' Khazih thuak ding genkhol hi. Hih la gen noppen sila pa' thuakna, sih na pen mawh na siansuah nading hi. Tua thu pen aneu 12 sung teng bek bek-ah giat vei hong daww hi (*Isa. 53:4-8, 10-12*).

Tua idea pen Isaiah 53:4-6 thugil mah mah-a Siampi Laibu' kammal lapah hi. Silapa pen a kigosa tuuno in kigen hi (*Isa. 53:7; Siam 4:32; 5:6; 14:13, 21 te tawh tehkaak in*). Passive dinmun ah a om pen Isaiah 53 ah kimu mah hi. Tua pen Siampi laibu ah a daww phadeuh omzia hi. Isaiah 53 sungah 16 vei daww-in 12 vei pen “*Niphal*” in kigelh-in gan tungah siampi' phuisam ngei'na khat hi. Tua zia pen mawhna taww kisai e ah kizang-a (*pasha*’, ‘*awon*, *khet*’) cihte avek-in khinkhin hi: “eite thu palsat nate [*pasha*] hangin amah kiliam sak a, eite khialhnate [*awon*] hangin kisatnim hi... Topa in ama tungah eite khempeuh khialhna [*awon*] a suan hi.... amaute khialh nate [*awon*] a puaksak ding hi... Amahin mitampite mawhna pua [*khet*] ci hi (*Isa. 53:3, 5, 6, 11, 12*).

Aneu 11 bang in siampite maww sian' suah dan lak phadiak hi. “Amah theihna tungtawn in a diktat ka nasempa in mi tampi diktang sak ding hi” (*Isa 53:11*). “Theihna” (*beda 'to*) in aneu 3na lehkaww hi. Tua takah “theihding” (*Ya du 'a*) na kizang-a Silapa pen mihing ahihna zui-in dahna thu thei hi cihna hi. Tua Lai Siangtho mun in thuaksiatna theih khak, sin khak na tungtawnin “diktang ding” hi. Dik tan'na thu a nung ah kigen hi “bang hang hiam cih leh amau te

khialhna a puaksak ding hi” (*Isa. 53:11*). Amaute khialhna apuaksak manin Silapa in mitampi diktangsak thei ding hi. Aneu 12 na ah “tampi” cih mah hong zang kik in tua in diktang sakna ngah hi cih kipsak hi. Tua hi-a Silapa in mitampite mawhna pua” hi (*Isa 53:12*).

Hih kammal le a gennop thute pen Lai Siangtho zia hi-in Silapa pen Levi-te’ biakpiakna zia bang-in Silapa mawhna pua, dik tang sak, Pasian kiang pan mawh maina a ngak sak gan biakpiakna kawh hi: “Amah in ama mawhna Biakpiak nadingin tuuno khat a paipih leh... ganhing lu tungah akhut nga ding a... Siampipa in mawh [*khet*] khuhna bawl ding a, ama mawhna kimaisak ding hi.” (*Siam 4:32-35*). Hih tak ah Thusia thuak Silapa in khat tang-in kipia cih honglak-a mawh maisakna ngah theih nadingin mawhneipa mun laak sak hi.

Khen III: Nuntakna-ah Zatpah Ding

Hotkhiatna i Ngah Nading Pasian Hong Kipiakkhiatna: Philippi 2:7 simin. “Bangmahlo bangin kong kikoih” cih thu ngaihsun in. Pasian in bang mahlo dingin hong kikoih nopna thu, na veeng, na tanaute ading na omzia kiguang tawm in. Na naseppih, na tate khantoh nading kiniamkhiat dingin na kiging nai hiam?

Ciaptehdingte
